



經籍典第四百十八卷

史學部紀事

書經虞書蔡傳堯典本虞史所作舜典以下夏史所作

按史不始於虞夏而史之有書傳於今者則自虞夏始故取以冠史學紀事之首

左傳宣公二年秋九月乙丑趙穿攻靈公於桃園宣子未出山而復太史書曰趙盾弑其君以示於朝宣子曰不然對曰子爲正卿亡不越境反不討賊非子而誰宣子曰我之懷矣自貽伊戚其我之謂矣孔子曰董狐古之良史也書法不隱趙宣子古之良大夫也爲法受惡惜也越境乃免

襄公四年冬晉魏絳曰昔周辛甲之爲太史也命百官官箴王闕

注

辛甲武王太史

襄公二十五

年夏五月太史書曰崔杼弑其君崔子殺之其弟嗣書而死者二人其弟又書乃舍之南史氏聞太史盡死執簡以往聞既書矣乃還

昭公二年晉侯使韓宣子來聘觀書於太史氏見易象與魯

春秋曰周禮盡在魯矣

注

魯春秋史記之策書春秋遵周公之典以序事故曰周禮盡在魯矣

昭公十二年楚子狩于州來次于乾谿右尹子革夕王與之語左史倚相趨過王曰是良史也子善視之是能讀三墳五典八索九丘對曰臣嘗問焉昔穆王欲肆其心周行天下將皆必有車轍馬跡

古今圖書集成
焉祭公謀父作祈招之詩以止王心王是以獲沒於祗宮臣問其詩而不知也若問達焉其焉能知之

史記周本紀幽王二年嬖愛褒姒褒姒生子伯服幽王欲廢太子太子母申侯女而爲后以伯服爲太子周太史讀史記曰周亡矣

陳杞世家成公元年楚莊王爲夏徵舒殺靈公率諸侯伐陳謂陳曰無驚吾誅徵舒而已已誅徵舒因縣陳而有之羣臣畢賀申叔時使於齊來還獨不賀莊王問其故對曰鄙語有之牽牛徑人田田主奪之牛徑則有罪矣奪之牛不亦甚乎王以徵舒爲賊弑君故徵兵諸侯以義伐之已而取之以利其地則後何以令於天下是以不賀莊王曰善乃迎陳靈公太子午於晉而立之復君陳如故是爲成公孔子讀史記至楚復陳曰賢哉楚莊王輕千乘之國而重一言

晉世家成王與叔虞戲削桐葉爲珪以與叔虞曰以此封若史佚因請擇日立叔虞成王曰與之戲耳史佚曰天子無戲言言則史書之禮成之樂歌之於是遂封叔虞於唐 晉侯會諸侯於溫欲

率之朝周力未能恐其有畔者乃使人言周襄王狩於河陽壬申遂率諸侯朝王於踐土孔子讀史

記至文公曰諸侯無召王王狩河陽者春秋諱之也

老子列傳老子者楚苦縣厲鄉曲仁里人也姓李氏名耳字伯陽諡曰聃周守藏室之史也自孔子死之後百二十九年而史記周太史儋見秦獻公或曰儋卽老子或曰非也世莫知其然否

孔子家語好生篇孔子讀史至楚復陳喟然嘆曰賢哉楚王輕千乘之國而重一言之信匪申叔之言不能達其意匪莊王之賢不能受其訓

七十二弟子解篇卜商衛人嘗返衛見讀史志者云晉師伐秦三豕渡河子夏曰非也已亥耳讀史志者問諸晉史果曰己亥於是衛人以子夏爲聖

正論解篇楚靈王汰侈右尹子革侍坐左史倚相趨而過王曰是良史也子善視之是能讀三墳五典八索九丘對曰夫良史者記君之過揚君之善而此子以潤辭爲官不可爲良史

後漢書和熹鄧皇后紀六歲能史書十二通詩論語諸兄每讀經傳輒下意問難志在典籍不問居家之事母常非之曰汝不習女工以供衣服乃更務學寧當舉博士耶后遵母言晝修婦業暮誦經典家人號曰諸生父訓異之注史書周宣王太史籀所作大篆十五篇也前書曰教學童之書也

順烈梁皇后紀少善女工好史書九歲能誦論語治韓詩大義略舉常以列女圖畫置於左右以自
監戒父商深異之

三國志蜀秦宓傳初宓見帝系之文五帝皆同一族宓辨其不然之本又論皇帝王霸養龍之說甚
有通理譙允南少時數往咨訪記錄其言

張裔傳裔博涉史漢汝南許文休入蜀謂裔幹理敏捷是中夏鍾元常之倫也

孟光傳光字孝裕河南洛陽人漢太尉孟郁之族靈帝末爲講部吏獻帝遷都長安遂逃入蜀劉焉
父子待以客禮博物識古無書不覽尤銳意三史長於漢家舊典好公羊春秋而譏呵左氏每與來
敏爭此二義光常譏譏謹昨先主定益州拜爲議郎與許慈等並掌制度

譙周傳周所著述撰古史考之屬百餘篇

吳呂蒙傳註江表傳曰初權謂蒙及蔣欽曰卿今並當塗掌事宜學問以自開益蒙曰在軍中常苦
多務恐不容復讀書權曰孤豈欲卿治經爲博士邪但當令涉獵見往事耳卿言多務孰若孤孤少
時歷詩書禮記左傳國語惟不讀易至統事以來省三史諸家兵書自以爲大有所益如卿二人意

性朗悟學必得之寧當不爲乎宜急讀孫子六韜左傳國語及三史孔子言終日不食終夜不寢以思無益不如學也光武當兵馬之務手不釋卷孟德亦自謂老而好學卿何獨不自勉勵邪

晉書傳元字休奕少時避難於河內專心誦學後雖顯貴而著述不廢撰論經國九流及三史故事評斷得失各爲區例名爲傳子

嵇康傳康善談理又能屬文其高情遠趣率然元遠撰上古以來高士爲之傳贊欲友其人於千載也又作太師箴亦足以明帝王之道焉復作聲無哀樂論甚有條理

曹志傳咸寧初詔曰鄆城公曹志篤行履素達學通識宜在儒林以弘胄子之教其以志爲散騎常侍國子博士帝嘗闕六代論問志曰是卿先王所作邪志對曰先王有手所作目錄請歸尋按還奏曰按錄無此帝曰誰作志曰以臣所聞是臣族父罔所作以先王文高名著欲令書傳於後是以假託帝曰古來亦多有是顧謂公卿曰父子證明足以爲審自今以後可無復疑後遷祭酒

皇甫謐傳謐字士安出後叔父徙居新安年二十不好學蕩遊無度或以爲癡嘗得瓜果輒進所後叔母任氏任氏曰孝經云三牲之養猶不爲孝汝今年餘二十目不存教心不入道無以慰我因嘆

曰昔孟母三徙以成仁曾父烹豕以存教豈我居不卜鄰教有所闕何爾魯鈍之甚也修身力學自
汝得之於我何有因對之流涕謚乃感激就鄉人席坦受書勤學不怠居貧躬自稼穡帶經而農遂
博綜典籍百家之言沈靜寡欲始有高尙之志以著述爲務自號元晏先生著禮樂聖真之論後得
風痺疾猶手不輟卷所著詩賦誄頌論難甚多又撰帝王世紀年歷高士逸士列女傳元晏春秋並
重於世

東晉傳晉博學多聞與兄璆俱知名少游國學或問博士曹志曰當今好學者誰乎志曰陽平東廣
微好學不倦人莫能及也轉佐著作郎撰晉書帝紀十志遷轉博士著作如故初太康二年汲郡人
不準盜發魏襄王墓或言安釐王冢得竹書數十車其紀年十三篇蓋魏國之史書大略與春秋皆
多相應其中經傳大異則云夏年多殷益干啟位啟殺之太甲殺伊尹文丁殺季歷自周受命至穆
王百年非穆王壽百歲也幽王旣亡有共伯和者攝行天子事非二相共和也武帝以其書付祕府
校綴次第尋考指歸而以今文寫之晉在著作得觀竹書隨疑分釋皆有義證晉才學博通所著三
魏人士傳七代通紀晉書紀志遇亂亡失

王接傳接學雖博通特精禮傳又撰列女後傳云

張輔傳輔論班固司馬遷云遷之著述辭約而事舉叙三千年事唯五十萬言班固叙三百年事乃八十萬言煩省不同不如遷一也良史述事善足以獎勸惡足以監誠人道之常中流小事亦無取焉而班皆書之不如二也毀貶晁錯傷忠臣之道不如三也遷既造創固又因循難易益不同矣又遷爲蘇秦張儀范雎蔡澤作傳逞辭流離亦足以明其大才故述辯士則辭藻華靡叙實錄則隱核名檢此所以遷稱良史也

劉耽傳耽字敬道少有行檢爲宗族所稱博學明習詩禮三史

陳壽傳壽又撰古國志五十篇益都耆舊傳十篇

祖台之傳台之字元辰范陽人也官至侍中光祿大夫撰志怪書行於世

王廙傳元帝卽位廙奏中興賦臣少好文學志在史籍

司馬彪傳彪字紹統高陽王睦之長子也出後宣帝弟敏少篤學不倦然好色薄行爲睦所責故不得爲嗣雖名出繼實廢之也彪由此不交人事而專精學習故得博覽羣籍終其綴集之務初拜騎

都尉泰始中爲祕書郎轉丞注莊子作九經春秋以爲先王立史官以書時事載善惡以爲沮勸撮教世之要也是以春秋不修仲尼理之關雖旣亂則師摯修之前哲豈好煩哉蓋不得已故也漢氏中興訖於建安忠臣義士亦以昭著而時無良史記述煩雜譙周雖已刪除然猶未盡安順以下亡缺者多彪乃討論衆書綴其所聞起於世祖終於孝獻編年二百錄世十二通綜上下旁貫庶事爲紀志傳凡八十篇號曰續漢書泰始初武帝親祠南郊彪上疏定議語在郊祀志後拜散騎侍郎惠帝末年卒時年六十餘初譙周以司馬遷史記書周秦以上或採俗語百家之言不專據正經周於是作古史考二十五篇皆憑舊典以糾遷之謬誤彪復以周爲未盡善也條古史考中凡百二十二事爲不當多據汲冢紀年之義亦行於世

孫盛傳盛篤學不倦自少至老手不釋卷著魏氏春秋晉陽秋并造詩賦論難復數十篇晉陽秋詞直而理正咸稱良史焉

謝沉傳何充庾冰並稱沉有史才遷著作郎撰晉書三十餘卷會卒時年五十二沉先著後漢書百卷及毛詩漢書外傳所著述及詩賦文論皆行於世其才學在虞預之右云

習鑿齒傳鑿齒爲滎陽太守是時溫覬覦非望鑿齒在郡著漢晉春秋以裁正之起光武終晉愍帝於三國之時蜀以宗室爲正魏武雖受漢禪晉尙爲篡逆至文帝平蜀乃爲漢亡而晉始興焉引世祖諱災興而爲禪受明天心不可以勢力強也凡五十四卷

孝友傳劉殷有七子五子各授一經一子授太史公一子授漢書一門之內七業俱興北州之學殷門爲盛

續咸傳咸著遠游志異物志汲冢古文釋皆十卷行於世

文苑傳袁宏字彥伯侍中猷之孫也父勛臨汝令宏有逸才文章絕美曾爲詠史詩是其風情所寄少孤貧以運租自業謝尙時鎮牛渚秋夜乘月與左右微服泛江會宏在船中諷詠聲旣清會辭又藻拔遂駐聽久之遣問焉答云是袁臨汝郎誦詩卽其詠史之作也

沮渠蒙遜載記蒙遜博涉群史頗曉天文雄傑有英略滑稽善權變梁熙呂光皆奇而憚之

宋書宗室傳臨川烈武王道規高祖少弟也道規無子以長沙景王第二子義慶爲嗣幼爲高祖所知曰此吾家豐城也撰徐州先賢傳十卷奏上之又擬班固典叙以述皇代之美性簡素寡嗜慾愛

好文義文詞雖不多然足爲宗室之表

沈曇慶傳曇慶吳興武康人大明元年督徐兗二州時殿中員外將軍裴景仁助戍彭城本僮人多悉戎荒事曇慶使撰秦記十卷叙苻氏僭僞本末其書傳於世

王淮之傳曾祖彪之尙書令祖臨之父納之並御史中丞彪之博聞多識練悉朝儀自是家世相傳並譜江左舊事緘之青箱世人謂之王氏青箱學淮之兼明禮傳贍於文辭

王韶之傳韶之父偉之家貧爲烏城令因居縣境好史籍博涉多聞初爲衛將軍謝琰行參軍偉之少有志尙當世詔命表奏輒自書寫泰元隆安時事小大悉撰錄之韶之因此私撰晉安帝陽秋旣成時人謂宜居史職卽除著作佐郎使續後事訖義熙九年善叙事辭論可觀爲後代佳史遷尙書祠部郎韶之爲晉史序王珣貨殖王廙作亂珣子弘廙子華並貴顯韶之懼爲所陷深結徐羨之傅亮等少帝卽位遷侍中驍騎如故景平年出爲吳興太守羨之被誅王弘入爲相領揚州刺史弘雖與韶之不絕諸弟未相識者皆不復往來韶之在郡常慮爲弘所繩夙夜勤厲政績甚美弘亦抑其私憾太祖兩嘉之出爲吳興太守文集傳於世

武三王傳江夏文獻王義恭幼而明穎姿顏美麗高祖特所鍾愛諸子莫及也撰要記五卷起前漢詔晉太元表上之詔付祕閣

沈懷文傳弟懷遠頗閑文筆撰南越志及懷文文集並傳於世

吳喜傳喜初出身爲領軍府白衣吏少知書領軍將軍沈演之使寫起居注所寫既畢闕誦略皆上口演之嘗作表未奏失本喜經一見卽便書無所漏脫演之甚知之因此涉獵史漢頗見古今

南齊書陸澄傳澄家多墳籍人所罕見撰雜傳死後乃出

文學傳崔慰祖與從弟緯書云常欲更注遷固二史採史漢所漏二百餘事在廚簞可檢寫之以存大意

高逸傳宗測字敬微頗好音律善易老續皇甫謐高士傳三卷又常遊衡山七嶺著衡山廬山記梁書沈約傳約所著晉書百一十卷宋書百卷齊紀二十卷高祖紀十四卷謚例十卷皆行於世樂藹傳其舅雍州刺史宗慤嘗陳器物試諸甥姪藹時尙幼而所取惟書慤由此奇之又取史傳各一卷授藹等使讀畢言所記藹略讀具舉慤益善之

徐勉傳勉常以起居注煩雜乃加刪撰爲別起居注六百卷

王筠傳其自序曰幼年讀五經左氏春秋凡三過五抄餘經再抄子史諸集皆一遍未嘗倩人假手並躬抄錄

張緬傳少勤學自課讀書手不輟卷尤明後漢及晉代衆家客有執卷質緬者隨問便對略無遺失緬性愛墳籍聚書至萬餘卷鈔後漢晉書衆家具同爲後漢紀四十卷晉鈔三十卷又鈔江左集未及成文集五卷

蕭子顯傳高祖雅愛子顯才又嘉其容止吐納每御筵侍坐偏顧訪焉嘗從容謂子顯曰我造通史此書若成衆史可廢子顯對曰仲尼讚易道黜八索述職方除九丘聖製符同復在茲日時以爲名對子顯所著後漢書一百卷齊書六十卷普通北伐記五卷貞儉傳三十卷

文學傳袁峻字孝高天監六年直文德學士省抄史記漢書各爲二十卷 劉昭字宣卿高唐人

初昭伯父彤集衆家晉書注于寶晉記爲四十卷至昭又集後漢同異以注范曄書世稱博悉遷通直郎出爲剡令卒官集注後漢一百八十卷幼童傳十卷文集十卷 鍾嶸字仲偉與兄昉弟嶠

並好學有思理矚嘗品古今論其優劣名爲詩評阮字長岳官至府參軍建康平著良吏傳十卷
吳均字叔庠吳興故鄣人除奉朝請先是均表求撰齊春秋書成奏之高祖以其書不實坐免尋有
敕召見使撰通史起三皇訖齊代均草本紀世家功已畢唯列傳未就普通元年卒均注范曄後漢
書九十卷著齊春秋三十卷廟記十卷十二州記十六卷錢唐先賢傳五卷續文釋五卷文集二十
卷 庾仲容字仲容潁川鄢陵人專精篤學晝夜手不釋卷除尙書左丞仲容博學抄諸子書三
十卷衆家地理書二十卷列女傳三卷文集二十卷並行於世 顏協字子和博涉羣書工於草
隸所撰晉仙傳五篇日月災異圖兩卷遇火湮滅

處士傳阮孝緒字士宗年十三徧通五經十五冠而見其父彥之誠曰三加彌尊人倫之始宜思自
勗以庇爾躬答曰願迹松子於瀛海追許由於穹谷庶保促生以免塵累乃著高隱傳上自炎黃終
於天監之末斟酌分爲三品凡若干卷 庾詵字彥寶新野人幼聰警篤學經史百家無不該綜

詔諡貞節處士撰帝歷二十卷續伍端休江陵記一卷晉朝雜事五卷總抄八十卷行於世

高昌國傳國人言語與中國略同有五經歷代史諸子集

陳書姚察傳元帝授察原鄉令時中書侍郎領著作杜之偉與察深相眷遇表用察佐著作仍撰史
陳太建初補宣明殿學士歷戎昭將軍知撰梁史事固辭不免後主纂業勅兼東宮通事舍人將軍
知撰史如故陳滅入隋開皇九年詔授祕書丞別勅成梁陳二代史所撰梁陳史雖未畢功文帝遣
內史舍人虞世基索本且進上今在內殿梁陳二史本多是察之所撰其中序論及紀傳有所闕者
臨亡之時仍以體例誠約子思廉博訪撰續思廉泣涕奉行大業初內史侍郎虞世基奏思廉踵成
二代史自爾以來稍就補續

顧野王傳幼好學長而遍觀經史精記嘿識無所不通太建六年領大著作掌國史知梁史事所著
輿地志三十卷符瑞圖十卷顧氏譜傳十卷分野樞要一卷續洞冥記一卷元象表一卷並行於世
又撰通史要略一百卷國史紀傳二百卷未就而卒

文學傳徐伯陽年十五以文筆稱學春秋左氏家有史書所讀者近三千餘卷試策高第
魏書昭成子孫傳忠子暉字景襲肅宗初拜尚書左僕射暉頗愛文學招集儒士崔鴻等撰錄百家
要事以類相從名爲科錄凡二百七十卷上起伏義迄於晉宋凡十四代暉病篤表上之

任城王傳王第四子彝彝兄順字子和下帷讀書篤志愛古除左僕射家徒四壁止有書數千卷撰
帝錄二十卷

文成王傳安豐王子延明以才學令望有名於世撰帝王世紀及列仙傳行於世

獻文六王傳彭城王勰字彥和敦尚文史物務之暇披覽不輟撰自古帝王賢達至於魏世子孫三
十卷名曰要略

闕駟傳駟博通經傳聰敏過人三史羣言經目則誦時人謂之宿讀撰十三州志行於世蒙遜甚重
之

劉昫傳昫字延明敦煌人昫以三史文繁著略記百三十篇八十四卷

李孝伯傳李瑒字琚羅涉歷史傳頗有文才氣尚豪爽每謂弟郁曰士大夫學問稽博古今而罷何
用專經爲老博士也

韓麒麟傳子興宗興宗子熙爲清河王懌常侍遷郎中令及元叉害懌子熙伏闕上書曰王之忠
誠欵篤節文純貞非但蘊藏曾襟實乃形於文翰搜括史傳撰顯忠錄區目十篇分卷二十旣欲彰

忠心於萬代豈可爲逆亂於一朝乞追遺志足明丹款

張繇傳繇歷覽經史高祖初襲祖侯爵世宗親政除光祿大夫上表曰私訪舊書竊觀圖史起元庖犧終於晉末凡十六代百二十八帝歷三千二百七十年雜事五百八十九合成五卷名曰歷帝圖亦謗木諫鼓虞人盤盂之類脫蒙置御坐之側時復披覽伏願陛下遠惟宗廟之憂近存黎民之念取其賢君棄其惡主則微臣雖沉淪地下無異乘雲登天矣世宗善之又表曰高祖遷鼎成周永茲八百乃命四使觀察風謠尋省本書差有髣髴凡有七卷今寫上呈

陽尼傳尼字景文北平無終人少好學博通羣籍與上谷侯天護頓丘李彪同志齊名幽州刺史胡泥以尼學藝文雅乃表薦之徵拜祕書著作郎奏佛道宜在史錄

北齊書宋顯傳顯從祖弟繪少勤學多所博覽好撰述魏時張緬晉書未入國繪依准裴松之注國志體注王隱及中興書又撰中朝名士傳十卷姓系譜錄五十篇以諸家年歷不同多有紕繆乃刊正異同撰年譜錄未成河清五年並遭水漂失

盧潛傳潛從祖兄懷仁字子友魏司徒司馬道將之子懷仁涉學有文辭情性恬靖常蕭然有閑放